
KI MAT EN PYRKHAT

Terra—I

- 1. Ki Khym'ew Khasi ba dang sah hapoh Assam**
- 2. Ka Tele Vision Studio & Tower etc
ba Catchmen Area ?**

U Bah Traising M—Pongroop


1987

Acc. No. 2747/12.

STATE CENTRAL LIBRARY
GOVERNMENT OF MEGHALAYA
S H I L L O N G

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book he shall be required to replace the book or pay its price.*

Help to keep the book fresh and clean



CHECKED
Date 8 Feb 1968
Shilong

Ki Mat en Pyrkhat

Ia kine ki jingthoh balyngkot lapynmih namat ka jingangnud bad jingkwah babha ban tei ia ka Ri bad ka jait bynriew. Ia kane laleh da kaba ia kdew bad ia pyni lyngkot halor ki mat bad jingpyrkhat ba ladep bad ba mynta; bad da kaba peit de ia ka ban sawan. Ym lah ban tei ne pynbha khlem ka jing iakdew bad jingiapyni. Lada don kano kano ka jingdun: Sngewbha wat yre thew.

Ia kane ka kot lah ban ioh na kine ki Address harum :—

**Seven huts Enterprise,
Synod Complex,
Rom No. 26,
Mawkhar,
Shillong - 1**

**U Tralsing M. Pongroop
Mawthoh Cottage,
Lawjynriew,
Nongthymmai,
Shillong 793014**

Der 6 Tyngka

Ki Khyndew Khasi ba Dangсах Hapoh Assam

DANG don bun ki khyndew ki shyiap jong ka Hima Khasi - Pnar kiba dangсах hapoh Assam. Kine ki long ki jaka ba ka Sorkar Phareng ka ladkhat na ki Hima Khasi bad pyniasoh bad ka Assam na ka bynta ka jingbit jongka ha ka bishar ka khalar. Kata ba ha ka jingsngew jong ka Sorkar Phareng, ka kham shitom ia ki nongsynshar jongka na Shillong ban leit khmih bad bishar ia ki briew jong kine ki jaka ba markhap bad ka Assam, hynrei ka kham suk ban leh ia kata da ki nongsynshar jongka kiba na Guahati. Ki Syiem Khasi kiba lashahjop ha ka Sorkar Phareng ki la shu shah ba kan dkhat bad leh katba ka sngewbit ha kato ka por. Kim don bor ban ialeh pyrshah wat la kim anon ia kata ha la ka dohnud.

Kiei ba kyrteng jong kita ki jaka ? Katno ka jingbeh jong ki ? Ki nongsynshar jong ka Hima Meghalaya ki tip ia kata. Ki paidbah paidkar ki tip ia ki kyrteng jong ki kattokatne hynrei kim tip ia u pud u sam bad ia ka jingbeh batikna jong ki. Kim ioh ruh ia ka bor ne ka hek bau ia tuklar ia kata na ba ka long ta kam ba lapynshet ne tynrong halor jong ki nongsynshar. Kaba ki paidbah ki lah ban leh ka long tang ban shu pynpaw

ia ka jingdawa hok jong ki bad kyntu ia kita ki nongsynshar ba kin leh ia kaba dokkam baroh. Dei ki nongsynshar kiba bat j. kin ap bad ki dular ki ban iathuh ia kaba shushu, bad ia kaba tikna ha ki paidbah. Bad ka dei ruh ka kamram jong ki nongsynshar ba kin leh ia kata naba ki long ki nongpeit bad ki nongpynbat ia ka hok jong u paidbah.

Ki jaka Khasi kiba dangsah mynta hapoh Assam, ba ka Sorkar Meghalaya ka dawa ki long kine harum :

1. Desh Dumriah hapoh ka Hima		Mylliem
2. Khanapara-Basistha	„	Mylliem
3. Mawtamur Nongwah	„	Nongwah
4. Boklapara	„	Nongspung
5. Bordwar	„	Nongkhlaw
6. Langpih	„	Rambrai
7. Nongriangsi	„	Rambrai
8. Nonglang	„	Nonglang Sirdarship.
9. Block & II	„	Jaintia Hills

Kitei ki jaka ba la rnyi haneng ki long kat kum ka jingiathuh jong U Bah P. R kyndih Myntri Revenue, Meghalaya ha ki Nongthoh Khubor. Ia ka jingheh jong kitei ki jaka ym shynt la iathuh paidbah.

Ka long kaba dei eh ba ki paidbah jong ka ri kin tip ia ki khyndew ki shyiap jong ka Hima bad ia u pud u saam jongki, naba ki paidbah ki long ki trai jong ka Khyndew, jong ka Hima. Ka riti u Khun Khasi - Pnar naduh mynbarim ka ong, "Ka khyndew ka shyiap ka long ka jong ki briew U Syiem u synshar hynrei um long trai halor ka Khyndew". Ki paidbah ki dei ban tip ia kaei ba lajia ia ka khyndew ka shyiap jong ka Hima. Haba ki paidbah ki tip ia ka jingshisha, kata ka jingtip ka pynskhem bad ka pynkhlain ia ka jingdawa ia ka hok. Te dei ka jingkhlain jong u paidbah hi ruh kaba pynkhlain ia ki nongsynshar halor ka jingdawa jongki ia ki hok jong ka Hima. Bad haba ki paidbah ki sah bieit bad ki tlot ki nongsynshar ki kylla tlot lang wat la ki stad bad ki kh'ain katno katno ruh. Namarkata, ki nongsynshar ki bastad ki ai lem ia ka jingstad bad ki pynkhlain ia u paidbah.

Ki Khasi - Pnar ki ladei ban ich lut ia ki Khyndew ki shyiap baroh na Assam naduh ka 15 tarik u August. 1947 ha ka dur ka ba biang kumba ki lalong shuwa ban dkhat juber da ka Sorkar Phareng. Ka Indian Independence Act. 1947 ka pynpaw shai ia kata. To ngin ia peit kumno ka Indian Independence Act, 1947, ne Ain laitluid ka India 1947 ka ong.

Article 7 (i) - naduh ka sngi ba labuh (k. m. 15th August, 1947),

(a) Ka Sorkar jong u Syiem ha Bilat kam don jingkitkhlieh shuh chaphang ka Sorkar jong kino kino ki Hima kiba ladoa ha shuwa kata ka sngi (i. e. shuwa ka 15th, August 1947) hapoh ka India jong ki Phareng (British India).

(b) Ka jinglongkynrad bahakhlieh jong u Syiem Bilat halor ki Hima - syiem basynshar hi ha India ka lakut, bad jingkat bad kata,

LAKUT: baroh ki jingiateh bad jingiakut hapdeng u syiem Bilat bad ki nongsynshar ki Hima syiem ba synshar hi ha India, kiba dang treikam haduh kata ka sngi ba lapdiang ia kane ka Ain (Ain laitluid ka India, 1947), bad

Lakut: ha kata ka sngi baroh ki jingtrei badei ban trei da u syiem Bilat ha ka jingiadei bad ki Hima - syiem basynshar hi hapoh ka India, bad

Lakut: baroh ki kamran jong u Syiem Bilat, kiba dangsah ha kata ka sngi, ha ka jingiadei bad ki Hima Syiem ba synshar hi ha India lane bad ki nongsynshar jongki, bad

Lakut: ha kata ka sngi baroh ki bor, ki hok, ki borjingpyniaid, ba dei ban trei da u Syiem Bilat ha ka jingiadei bad ki Hima syiem synshar hi ka India kiba kat kum da ka jingiateh, ne da ka jingaibor, ne da ka jingshah ne da kano kano ka rukom, bad

(c) Lakut ruh baroh ki jingiateh bad jing-iakut, kiba dangtrei kam haduh kata ka sngi ba lapdiang ia kane ka Ain (Ain laitluid ka India, 1947) hapdeng u syiem Bilat bad kino kino ki briew ba la iohbor ban feit halor ki jaka ri - lum, bad

Lakut: Kino kino ruh ki kamram jong u Syiem Bilat ba dangsah ha kata ka sngi ha ka jingiadei bad kino kino ki briew lane ha ka jingiadei bad ki jaka Ri - lum, bad,

Lakut: baroh ki bor, ki hok, ki bor jing-pyniaid kiba dangsah haduh kata ka sngi ba dei ban trei da u Syiem Bilat ha ka jingiadei bad ki jaka Ri - lum kiba da ka jingiateh, ne da ka jingaibor, ne da ka jingshah, ne da kano kano ka rukom:

Kat kum katei ka Ain (Ain laitluid ka India, 1947, Article 7(1)(a)(b)(c), naduh ka 15th August, 1947 ki Hima Sviem ba synshar hi (Kynthup ia ki Khasi States) kiba long mynshuwa hapoh ka jingpeit jong u Syiem Bilat, ki la ioh biang baroh ia ka bor synshar ba ha khlieh duh hapoh la ka Hima. Ryngkat bad kata, ki la ioh biang ia ki hok baroh ryngkat bad u pud u seam ba dap biang jong ka Hima uba long kumba lalong shuwa ka jingiateh, ne jingiakut, ne jingpynbeit bad ka Sorkar Phareng. Lada ka dangbat khyndiat ka khyndew ha lade khlem pynphai, ne lada ka dang

pynsah khyndiat ka khyndew ta ladkhat na kawei ka hima, da kaba tuh ha kawei pat ka Hima, kumta ba kata ka Hima kaba la iohpdiang ia kata ka khyndew ba ladkhat na kawei ka Hima kam pat pynphai ia kata, sha kata ka Hima kaba dei hok, KATA ka jingailaitluid ne ka jingioh laitluid kam pat pynjanai ia ka jingai bad jingioh hok kat kum ki jingmut ba kyntang ne spirit joig kata ka ain laitluid.

Ia ki Hima Khasi la ai laitluid naduh ka 15th August, 1947 katkum ta Ain laitluid ka India, 1947, Article 7(1)(a)(b)(c). Hynrei katto katne na ki khyndewki ki shyiap jong ki Hima Khasi dang sah hapoh ka Hima Assam. Da k ne ngi iohi ba, katba ki Hima Khasi kim pat ioh lut ia ki khyndew ki Shyiap napoh ka Hima Assam, ne katba ka Hima Assam kam pat pynphai lut ia kito ki khyndew ki shyiap kiba dei hok jong ki Hima Khasi, kita ka bat katkum da ka jingpynbeit jong ka Sorkar Phareng ba la pynkut noh da ka Ain laitluid, 1947, ia ka jingpyntrai kam ia kane ka Ain ym pat shym lapyndep ne ym pat shym la pynjanai. Ki khyndew ki shyiap jong ki Hima Khasi kita dang sah mynta hapoh Assam, ki long ki khyndew ba ka Assam ka bat lym hok bad bym shong ain. Ia kine ki khyndew ki khasi ki dang dei ban ioh katkum ka Ain laitluid ka India 1947, bad ban pyniashoh shano shano, hynrei hapoh ka Indian Union kat kum ka Instrument of Accession, ne ka dular ia soh.

Ia ka Indian Independent Act, 1947, ne Ain Laitluid ka India, 1947 lathaw badlapassed da ka Parliament jong ka Ri Bilat, kaba long ka nongai ia ka jinglaitluid ia ka Ri India. Kumta kiwei pat ki tor (thir party), kiba napoh jong ka Ri India ne nabar kim lah ban pyntam ne pynduna ia ki hok jongno jongno nalog jong kita ba la buh hapoh kane ka Act, ne ka Ain. Ka bynta kaba nyngkong eh ia ki nong India baroh ka long ban Pdiang ia ki hok baroh kumba ka Act ne ka Ain ka la ai. Kumta ruh ki Hima Khasi ki dei ban ioh pdiang ia ki hok baroh kumba ka Ain ka la ai. Hadien kata, ia ka jingiaai bad jingiashim ha kaba pynlong ia kawei ka India bashityllu kan long da ka jingpynheit ba kyrpang.

Ban shu pynkynmaw, ka Federation jong ki Hima Khasi, khlem da ia tuklar ia u pud u saam jong ka Hima ba dang dei ban ioh ha kato ka por, ki la iasoi ia ka dular iasoh bad ka Indian Union da kaba pdiang ia ki jingpynbeit ryntih kumta long ha kata ka por (existing administrative arrangements), lait noh katto katne, da ka jingsngewthuh jingmut bad jingiakut ba yn dang don ka jingpynbeit ryntih bathymmai (new or modified administrative arrangements). Kata ba ia u pud u saam, Ki khyndew ki shyiap ba ym pat ia kren bad ba ym pat ioh lut, tad ia kiwei kiwei pat ki hok ba ki Khasi ki dang dei ban ioh yn dang ia

pynbeit thymmai. Kumta ngi iohi ba u pud u saam jong ki Hima Khasi bad kiwei kiwei rat ki hok kumba la kynthup hapoh ka dular iasoh ki long kiba dang duna. Ha ka jing-shisha, kat kum ka jingiakut, la dei ban pynbeit thymmai ia ki kam ba dang sah baroh hapoh 2 snem. Hynrei ki syiem bad ki nongsynshar balaleit jong ngi ki la ryrstem ia ka jingdawa ban ioh la la jong ka hok wat la ka Sorkar India ka plie rynghang ia ka jing-khang na ka bynta kata.

Na ki jingjia kiba ngi la tip bad iohi, ngi shem ba ki syiem, ki nongsynshar, kiba khraw, bad ki riewkhrat ba la niew burom da ki Khasi, kiba la im ha ka spah snem kaba 20 (naduh ka snem 1915 - 1947) kim shym da ialeh shitom ban sumar ia u pud u saam jong ka Hima ne ban pynioh ia ki hok jong ka jait byriw kumba dei ban ioh.

Ngi tip na ka History ba naduh ka si em 1915 ki riew - ieit - ri bashisha jong ka ri India ha ri thor ki la sdang ia ka jingiakhih ban pynioh ia ka jingsynshar hi ia ka ri India. Kane ka jingiakhih ka labtur sha la jingiakhih ka -ba khamkhraw shuh shuh. Bad ha ka snem 1927, haba la iohi ba ka Sorkar Phareng kam mon ban ai ia ka jingsynshar hi (Home rule), hynrei ka iaiialeh ban khniot ja ka jing-iakhih, ki riew - ieit - ri jong ka ri India ki la rai ban ialeh tynggeh ban pynioh syndon ia

ka jinglailtuid phar na ka kti jong ka Sorkar Bilat. Bad ka thma bah ba ar ka lapynstet ia ka jingiohlaitluid jong ki nong India.

Ha ka snem 1942 ka thma bah ka la jur bha. Ki Japan ki la wan hiar thma ia ka ri India na sha mihngi. Ha kane ka por ka Sorkar Phareng ka la iohi ba yn ym lah tan iada ia ka ri India na ka jingwan hiar thma ki Japan lada ki nong India kim iatylli ha ka liang jong ka Sorkar. Ha ka juh ka por ka Sorkar Bilat ka la iohi ba ki nong India kim shongthait ha ka jingialeh ban ioh ia ka jinglailtuid. Kumta ban iada ia ka ri India na ka jingshab jop ha ki Japan, ka Sorkar Bilat ka lakhot ia ki jingiatrei lang jong ki nong India ha ka-ba ialeh ia ka thma ban iada ia ka ri jong-ki pyrshah ia ka jingwan tur jong ki Japan. Bad ka la pynbna ban ai noh ia ka jinglailtuid tang shu dep ka thma.

Ki syiem, ki nongsynshar bad ki riewkhmat badonburom jong ka ri Khasi - Pnar ki latip ia kitei ki jingjia borch ha kito ki por. Hynrei sah tang ka jingtip kim shym ia leh eiei ruh em.

Ha ka jingshisha wat la kim pat sngew dei ban iashim bynta ha ka jingiakhiah jong ka snem 1915 bad 1927, hynrei ki ladei ban shim ia ka kabu bakhrav jong ka snem 1942 mynba ka Sorkar Bilat ka la pynbna ban ai ia ka jingsynshar lailtuid ia ka Ri. Ha

kane ka snem ki ladei ban peit bad ban iakren iapynbeit lupa ia u pud u saam jong ka Hima. Kumta ba lada jia ba ka wan ka jinglailtuid kumba lakular kin ioh ia u pud u saam jong ka Hima kumba ki dei hok ban ioh. Lada ki laleh ia kane ha ka por ba ka Sorkar Bilat ka dang don ha ka bor ki jingeh kiba ngi ia kynduh mynta ha kane ka bynta kin ym da la jia. Ha ka jingshisha ka por ka dang ap ia ki haduh ka sngi shuwa jong ka 15th August, 1947 lada ki kwah ban leh eiei.

Nangta ha ka snem 1951 pat ka Sorkar Assam ka nang pynrit shuhshuh ia ka Hima Khasi da kaba dkhat noh ia ka lyngkhot khyn-dew kaba heh na ka Hima Khasi, kaba latip kum ka Block I&II bad pyniasoh sha ka Assam. Ia kane pat ruh ki nongsynshar bad ki riewkhmat jong ki Hima Khasi ki shah ba ka sorkar Assam kan leh kumba ka sngewbit. Kin, shym ialeh ban bat iala ka jong ka hok. Lada ki nongsynshar bad ki riewkhmat jong ka ri ki la pynsngew ia u paidbah ban bat iala ka jong ka hok bad ialeh tynggeh ban ym shah ia ka sorkar Assam ban shim ia kitei ki jaka, ka Sorkar Assam kan ym nud ban leh jubor. Na kine ki jingjia, ngi iohi ba ki nongsynshar bad ki riewkhmat jongngi ki Khasi ha kitei ki por, ki long ki briew ki bym don ka jingangnud ban wan rah pat sha la ka Hima ia ki hok jong ka jaitbynriew kiba la sah slem shabar, lyne pangnud ban

duh noh shuhshuh na kaei kaba ka don. Kine ki long ki sngi kiba dum ha ka Niewtang ne History jong ka jaitbynriew. Kim don ka jingsngewsarong ha la ka jong ka jaitbynriew bad ha ka jinglailud jong ka Ha ki hok jongka ym don ruh kiba sngewkhja. Ka daw bakongsan jong kane ka long ka jingioh shongsuk than jongki hapoh ka jingsynshar jong ka Sorkar phareng. Don ka ma haba than eh ka suk !

Ha kito ki por la don bun ki briew ki bastad bad bashemphang hapoh ki Hima Khasi. Hynrei ka jingiohshongsuk jongki ka la pynduh ia ka mynsiem ialeh bad trei shitojn. Kumta wat uba kham stad eh hapdeng jongki u lajied tang ia kawei ka lynti—ka ban wan rah ia ka jingsuk ha ka jaitbynriew. La don u Khasi uba kham paw eh na baroh ha ka kyrdan bad ha ka jingstad ha kito ki por. La niew ia "kum uwei na ki khlur baphyrnai hapdeng ki Khasi-Pnar. Une u long u Bah Joy.

La kha ia I Bah Joy ha Shylla ha ka 12th June, 1884. I la pass ia ka B. A. na Calcutta mynba I ladap 20 snem ei ei ka rta bad sepg ruh ia ka Balang U Blei ha Ri Khasi - Pnar, ha ka snem 1904. Ha ka snem 1914 I la leit jngoh ia ka Ri America. Bad haba I la wan phai na America I laseng ia ka Compani shna um soh, ka "Fruit Co. Pvt. Ltd." ha ka snem 1818. Kane ka long ka Compani kaba nyngkong eh ha kane ka Ri jong ngi

ba laseng ym da ka Sorkar. Kane ka Kompani ka la-ai jingtrei ia ki bahun ki briew bad ka lalong ka jingkyrkhu taklraw ia ki nongrep soh hapoh ka ri.

Te naduh ka snem 1921 I bah Joy I la long u dkhot ne u member jong ka Dorbar thaw ain ha ka Assam Assembly. Bad I la bat ia ka kam kum u Minister ne myntri hapoh ka Sorlar Assam 20 snem lynter naduh ka snem 1937. I Bah Joy I la long ruh tang ma I ra rdeng ki Khasi Pnar, iba la long u dkhot ha ka Dorbar thaw ain (Constituent Assen.bly) jong la ri India ha kato ka por. Bad kumta I la long u iktiar ba k'ngsan nardeng ki Khasi Pnar ha kaba wanrah bad buh ia ka rukom synshar na ka bynta ki Hima Khasi hapoh ka ri India baiar.

Haba hishar ia ka rta, ia ka jingnang jingtip, ia ka kyrdan babun ba i labat bad ia ka por ha kaba I bah Joy I la - im, ngi tip shai ba I la long u briew uba la tip bha ia ki jingjia baroh ha ki jingiakhih ha ka liang ka sain - pyrthei hapoh India, kaba lalong naduh ka snem 1915 ter ter haduh ban da ioh ia ka jinglailuid ha ka snem 1947. Pynban don bun ki jingjia badonkam eh ha ka jingiadei jong ka jaitbynriew bad kiwei pat ki Bor - synshar ba I bah Joy Im shym la pynpaw ia ka jingtrei jong I ne Im shym la

ia shim bynta. Kane ka lapynlyngngoh ia u paid Khasi - Pnar babun ha kine ki sngi.

Kawei na ki jingjia badonkam eh ha ka jingiadei bad ka iaitbynriew ka long ka jingpynbna jong ka Sorkar Phareng ha ka snem 1942 ban ai laitluid noh ia ka ri India hadien ka thma. Haba lamih kane ka jingpynbna. I Bah Joy Im shym la kyntu ia ki syiem, ne khot ia ki riwkhmat, ne pynkhih ia ki paidbah ban iakren bad ka Sorkar Phareng shaphang ka dur ban pynlong ia ki Hima Khasi, ka Hima balaitluid. Ladon ki rangbah Khasi, kiba laiakren bad I bah Joy ha kato ka por ban ialeh ban pynlong ia ki Hima Khasi, ka Hima balaitluid shabar ka India, hynrei I Bah Joy Im treh.

Nangta ngi iohi ba I Bah Joy Im shym lakyntu, Im shym lapynkhih ruh ia ki syiem ne ia ki paidbah ban dawa na ka Sorkar Phareng ha kato ka por, ba kan pynpha noh ia ki khyndew ki shypap jong ki Hima Khasi na ri thor sha ki Trai Hima, habi latip ba ka Sorkar Phareng ka la pynbna ban ai laitluid noh ia ka Ri India. Katha ki riw - ieit - ri, ki nongialeh laitluid jong ka ri India ha dkhar, ki la ialeh da bun ki lid ryngkat ki jingiakren bad ki jingthoh ban pynbeit shaphang kaba kumno ka dur jong ka India balaitluid kan long. Ki rongialam jong ki Muslim ruh ki la leh kumjuh.

Ki Hima khasi ha kito ki por, shuwa jong ka 15. 8. 1947, ki la long ki Hima laitluid synshar hi kat lum ki jingiateh (semi-independent states) hapoh ka sorkar Phareng. Ki don ka kyidan kaba kham halor ban ia kito ki hima ba la shahjop bad bym don jingiateh. Ka rukom synshar jong ka Sorkar Phareng halor jong kine ki Hima Syiem ka long ruh tang kat kum ki kyndon ha ka jingiateh, ka pher na ka rukom ba synshar ia kito ki ri thor ne ri dkhar ba la shahjop bad bym don jingiateh. Don ruh shibun ki Hima Syiem ha ri dkhar kiba synshar hi kat kum ki jingiateh bad ka Sorkar Phareng.

Ha ka jingpynbna ban ai laitluid ia ka ri India ka sorkar Phareng ka don ruh ka jingthmu babha ban ai ha kito ki Hima Syiem ha India ia ka Dorbar thaw aiñ balaitluid. Kata, ba ki lah ban pynlong ia ki Hima Syiem jongki, ki Hima balaitlud shabar na ka India lada ki mon. Ka Sorkar Phareng ka leh ia kane da kaba pyrkhat hok namar ka la synshar halor jong kine ki Hima tang kat kum ki jingiateh, bad ba ka kyrdan jongki kam iadei bad kiwei pat ki hima ba laduh noh ia ka jingsynshar hi bad bym don jingiateh. Ha ka jingshisha ka dei ban long kumta lada ki Hima Syiem ki kwah. Ka third party ne kiwei pat kim don hok ban pynwit lada ki Hima syiem hi ki mon. Ia kane, ki nongialeh laitluid jong ka ri India ki pyrshah. Ki iohi ba kane kan pynpra ia ka India ba ka Sorkar Phareng hi

ka lalah pynlong kawei. Ban shu kynmaw, ka India shuwa ban wan jop bad synshar da ka Sorkar Phareng kam kynthup lut ia ki Hima Syiem baroh. Ki Hima Khasi ruh ki long baroh shabar u pud u saam ka India shuwa ka jingwan jong ki Phareng.

I Bah Joy im long u nongialeh laitluid ne freedom fighter. Hynrei I la long u nongialeh bashitrhem ha ka jingpyniasoh ia ki Hima Khasi hapoh ka Indian Union. Napdeng ka jaitbynriew Khasi - Pnar, lajied tang ia I marwei ban long u dkhoh jong ka Dorbar thawaiñ (Constituent Assembly) ha Delhi ha kata ka por ban iashim bynta lang ha kaba pynbiang ia ka Constitution jong ka ri India, khamtam ha kaba iadei bad ki Hima Khasi. Di ka jingiadon ryngkat jong I ha ka Dorbar Thawaiñ ka ri India, lalah ban pynrung ia ka Sixth Schedule hapoh ka Constitution jong ka ri India na ka bynta ki Hima Khasi - Pnar. Bad la pynioh ruh ia ka jingsynshar District Council na ka bynta ka Ri Khasi-Pnar kumba long haduh mynta. Nangta da ka Instrument of Accession ne Dular iasoh, lapyniasoh ia ki Hima Khasi baroh hapoh ka Indian Union. Pynban lapyniasoh ia ki Hima khasi tang kum kawei na ki District hapoh ka Hima Assam.

Ki syiem, ki riengkhamat bad ki paidbah babun jong ka ri ki la jied ia ka jingiasoh ban sah hapoh ka Indian Union ha kadur ba

I Bah Joy I la trei shitom. U Rangbah na pdeng ki Khasi Pnar, u bym kwah ban pyniasoh ia ki Hima Khasi hapoh ka Indian Union, hyurei uba kwah ba ki Hima Khasi kin long ka Hima ba lalaitluid, dei tang u Bah Wiklipph. U don tang khyndiat eh ki nongkyrshan ki bym paw. Kum kine kiba iapyrshah ki don hi iwei ar wat ha Assam ruh. Hynrei haba u paidbah babun byllien jong ka ri um sngap ia ki, kumta ni ki shu jah noh. Ha kano kano ka jingialeh ka mon jong u babun ka jop bad ia kata la pynskhem.

Hynrei ngi sngewlyngngoh shaphang ka jingstad jong kito ki nongialam kiba pynlong ia ka jingiasoh ha kato ka por. Shisha ki long ki bastad! Hynrei hato ki don ma ka jingiohi jngai? Ki Hima Khasi ki lalong lupa ka ri basynshar laitluid hi kat kum ki jingiateh (semi independent states) hapoh ka Sorkar Phareng ha kato ka por. Ki lalong kham halor ha ka kyrdan ban ia ka Assam ha kato ka por, bad lapyllaitluid ruh kyrpang ia ki kat kum ka Ain laitluid ka India, 1947 (Indian Independent Act, 1947). Pynban ia kine ki Hima Khasi lapyniasoh markhongpong hapoh ka India Union, da kaba pynhapoh ia ka kyrdan jong ki tang kum kawei na ki District hapoh ka Hima Assam. Hato don ka jingiohi jangai ha kane ka jingleh? Ai ba ka Niewtang ne History kan pynpaw.

Ha ka jingshisha, I Bah Joy I lah uan
 lakren hapoh ka Dorbar Thaw Ain jong ka
 ri India ha kata ka por ban bat fa ka Kydan
 bakyrpang jong ki Hima Khasi hapoh ka
 Indian Union, bad ban pyniasoh ia ki hapoh
 ka Indian Union kum ka State ne Hima ba
 iaryngkat dor bad kiwei pat ki State ne Hima
 jong ka ri India naduh kata hi ka por.
 Don ka lad ba lah ban leh ia kane ha kata ka
 por da kaba pynieng tylli ia ki syiem, ia ki
 nongsynshar, bad ia ki khun ki hajar baroh
 ban dawa ia ka hok ha kata ka dur. Ka
 long kaba shongnia bad kaba lah ban leh fa
 kata namar la ai ia ki Hima Khasi ia ka
 jinglailtuid bad ia ka hok ba ki lah ban
 jied ban pyniasoh ia lade. Namar ym
 shym lalah ia kane ha kata ka por, ki Khasi
 Pnar ki lahap ban mad ia ki jingeh ba pyn-
 kthang. Ki lahap ban ialeh shitom ban pynieh
 ia ka Hill State na ka bynta jong ki kumba
 ka long mynta. Bad ki laioh ia ka hi ka
 jingtrei shitom - hadien 25 snem; Ki paidban
 ka ri Khasi - Pnar ki ladawa ban ioh ia ka
 Hill State namar ba don ka jagduna ha ka
 rukom pyniasoh ia ka ri jongki ha ka dur
 kaba mynshuwa. Bad ki laioh ruh. Da kane
 ki lapynbeit ia kawei ka jingbakla, ba lajie
 ha ka Niewtang jong ka jaitbynriew, namar
 ka jingbymihi jngai jong ki nongsynshar bad
 ki nongialam bamynshuwa. Lada ka rukom
 pyniasoh ia ka ri jongki ba ka dur kaba
 mynshuwa ka la biang, te ka jingdawa Hill State

jongki, ka labakla.

Sa kawei ka jingduna ba laleh ha ka por balajied sha ka jingpyniasoh ka long ba ym shym ladawa ban ioh pat ia ki Khyndew ki shyiap hok jong ki Hima Khasi basah ha ri thor. Bad ba hadien ba ladep ka jingiasoh ruh dang shah da kaba suk ba ka Assam kan dang shim shuhshuh ia ki khyndew ki shyiap na ka Hima Khasi. Kane ka long ka jingeh kaba ngi dang mad haduh mynta. Kata ba ngi dang dei ban ialeh ban wanlam pat ia kitei ki khyndew ki shyiap baroh ar sha ka Hima.

Shisha, hadien ba laioh ia ka State Meghalaya, ki nongsynshar na kawei ka por sha kawei ka por lyngba ki party ne ki kap bapher ki la iakren bad ka Sorkar Assam ban pynphai noh ia ki jaka Khasi sha Meghalaya. Hynrei ym shym ladon ka jingseisoh namar ym shym ladon ka jingiatylli bad ka jingtrei batynggeh. Bad ba haba latrei ia ka kam ym shym ladon pat ka jingbuddien baiaine.

Lajudon ruh ki khep ba haba ka liang ka Sorkar ka lasdang ia ka kam ban ia kren halor kito ki khyndew ki shyiap, bad shaphang u pud u saam katha ki thana ne ki member na ka liang pyrshah pat ki shu ia khmih. Imat kumba ki don ban ong, "ngin iakhmih haduh katno ki lah ban leh." Ki shu ia

khmih aju kan jia hynrei kim mon ban iatur
 ia ka dieogtyllaw ban pynmeh ia ka- ding.
 Bad haba ki thana ne ki member na ka
 liang pyrshah pat ki kwah ban pynkhih ia ka
 kam ban iakren, ka liang Sorkar pat ka shu
 ai bun ki daw ba ka laleh ia ka kam, Hyn-
 rei ka kam ka shu sah ha juh. Haba shu
 peit, imat kumba kawei ka liang ka kwah la
 kajong ka burom ban pyni ha ki paidbah ba
 dei maka kaba leh ia ka kam. Bad kawei
 pat ruh kumta hi. Ki iabat sah ia ki kuli
 elekshon wat haba ka jingialeh ka lakut.
 Lehse ban pynkhlañ ia ka rngiew na ka
 bynta ka jingialeh ka ban sa wan! Te haba
 ym don ka jingiattyli ka jingtrei ka tlot. Bad
 ka kam ruh ka shu sah hajuh Katba ia ka
 jingmyntoi nang ioh bam hun ei kiwei.

Shisien lapaw ha ka Byrta ne ka Khubor
 ba u Bah Martin Majaw u la leit sha khap-
 pud bad pynkynriah ia u mawpud uba dei
 hapdeng ka Assam bad Meghalaya. Na ka liang
 jong ki nongsynshar Meghalaya ki lakren pyr-
 shah ia kane. Ki ong ba ka long ka jingleh ka
 bym shong ain. Ki briew kiba don hala ki kap
 ne ki party ki bym iadei jingmut bad u Bah
 Martin, ki ruh ki la kren. Ki la ia ong ba ki jing-
 leh jong u ki long kiba pynsniew. Hynrei u Bah
 Martin u laleh khnang ia kane tang ban pyn-
 khie im ia ka jingiakren naba u laiohi ba baroh
 ar ki Hima ki shu ia sngap jar jar. Ngim
 sngewphylla ia kane Kumta kiwei pat kiba
 sngewthuh ia kane ka jingthmu jong u Bah

Martin, ki ia ong, "lah kumta ban kham kloï ka jingiakren bad ka jingiapynebeit."

Ka jingiakren halor ki khyndew ki shyiap bad halor u pud u saam kaba idon sbisha ka jingkyrmen ka la long pat ha ka snem 1985. Ha ka jingiakren, ha kane ka sien u Chief Minister ka Assam, u Sri Saikia bad u Chief Minister ka Meghalaya, u Sri W. A. Sangma na baroh ar Hima ki lathung ia ka Kommiti ban peit bnjah halor jong kane ka kam. Bad lajied ia u Y. V. Chandrachud kum u Chairman jong kata ka Kommiti. Hynrei ka jingtrei ka iaïd suki jai. Lashim bun ka por ha kaba wad ia ki jingtip, ia ki kot ki sla, ia ki map ki-ba donkam ban buh hakamat ka Committee. Ka Kommiti ka lasdang ban shong haduh u bnai December jong ka snem 1986, bad labuh por ban pyndep hapoh u bnai Rymphang, February 1987.* To ngin ia ap bad khmihlynti ia ka babha.

Tang kawei ngi dei ban tip ba ngi lah ban ioh ia ka hok, lada ka jingdawa ka long ka bahok bad lada ngi lah ban iengskhem halor jong ka. Mano ban ai noh da kaba suk ia ka spah balaiohbat? U Chief Minister bathymmai jong ka Assam, u Sri P. Mohanta, shisien u lakren ha ki nongthoh kot khubor ha ka snem 1986 ba um lah ban ai sha ki Khasi shi inshi ka khyndew ba ki dawa. Bad u la ong ruh ba ka long ka bym lah ban long ba tang namar ba ki Khasi ki la shong ha kat: ka

* Hynrei ia kane ruh lapynkynria'i noh sha u wei pat u bnai.

jaka, kata ka jaka kan long noh ka jongki Khasi.

Ka jingkren jong u Sri P. Mohanta, shah ym ai ne pynphai sha ki Khasi ia ki Khyndew ki shyiap kumba ki dawa ka lah ban long tang lada lalah ban pynshisha ba kita ki khyndew ki shyiap ba ki dawa kim shym hap hapoh ka Hima Khasi mynno mynno ruh. Hynrei haba lapynshisha ba kita ki long da shisha ki hok jong ki Khasi, kiba hap hapoh ka Hima Khasi, ym dor daw balei ba ym lah ban ai bad balei ym lah ban ithuh ia ki hok jong ki! Ki Khasi ki don ki dokuman ne duhr, bad ki map ki babiang, kiba pyni ba kitei ki Khynew bad ki jaka ba ki dawa ki long ki khyndew hok jongki, bad ba ki long kiba ladon ne hap hapoh ka Hima Khasi. Ngi dei ban kynmaw ba kane ka jingdawa ka long ka jingdawa jong ki briew shitylli kum ka Hima ym dei ka jingdawa shitet. Ngi dei ruh ban tip ba ki Khasi ki ba shong ha kitei ki jaka, ki shong kein hapoh ki jaka hapoh ka juh ka jingsop, kaba lalong hapoh la ka jong ka Hima jongki hi, ym hapoh ki jaka kiba lalong hapoh ka Sorkar Assam. Hynrei ka Sorkar Assam ka bat bym hok ia kito ki jaka da kaba pyndonkam ia ka iktiar jong ka Sorkar Bilat ha India ka ba laleit noh, bad ia kaba lapynkut noh kat kum ka Indian Independent Act, 1947.

Ka Sorkar Assam ka dei ban pynphai ia kito ki jaka Khasi baroh, bad ia ki jaka

Garo baroh kiba ka Sorkar Meghalaya ka la buh ha ka jingdawa, shapoh ka Hima Meghalaya. Lada ka Sorkar Assam kam pynphai ia kito ki jaka badei hok, kiba kat kum u pud u saam ba dei hok, da ka jingpynbeit kaba suk kat kumba la buh ha ka Commission, ka Sorkar Meghalaya ka dei ban ialeh da ka kyrsan ne mukotduma ha ka Kashari ne Court ba hakhlieh duh (supreme Court) jong ka ri India. Bad ngim dei ban ai lad ia ka Sorkar Assam da lei lei, ba kan dangbat ia ki khyndew hok jong ki Hima Khasi da kaba kan dang pyndonkam kum ka iktjar ia kinokino ki jingiateh, ne jingiakut re jingiapynebeit (administrative arrangement) ba lapynlong hapdeng ki Syiem Khasi bad ki Sorkar Phaieng ha India ba la leit, ia kiba la pynwai bad pynkut noh da ka Indian Independent Act, 1947.

Shisha, kumba la kynthoh u Sri P. Mahanta, kam long kaba shongnia, ba tang namar ba ki briew ki la shong ha kata ka jaka, kata ka jaka kan long noh ka jong kata ka jaitbynriew." Kam long kaba shongnia ba ki briew jong kawei ka Hima, haba ki leit shong hapoh kawei pat ka Hima, ba kin dawa ia kata ka jaka ba ki leit shong ban long noh ka Hima jongki ne ban pyniasoh noh sha ka Hima jongki tang namar ba ki la shong hangta bad ba ki briew jongki ki la kham bun ban ia ki trai Hima ha kata ka jaka. Lada ailad ia ki briew jong kawei ka Hima, kiba leit shong hapoh kawei pat ka

Hima, ba kin dawa Hima lajong ne pyniasoh sha ka Hima jongki na ka Khyndew jong kata kawei pat ka Hima ba ki leit shong, tang namar ba ki lakhambun ki briew. Jong ki ha kata ka jaka ban ia ki trai Hima, kata ka jingailad kan pynmih ia ka jinglamwir bad ia ka jingjot thiaw Naba ki heh ne ki bun paid na kiwei kiwei ki Hima kin ia tar bad kin ia pynjot thiaw ia ki hok jong ki rit paid bad ia ki Hima jong ki da ka buit leit shong - shnong. Kan pynmih ruh tang ia ka jingiashun bad jingialeh pyrshah hardeng jong ka jaitbynriew. Kan pynmih ruh ia ka jingphiah bad jingpharia lyngkhot lyngkhai ia ki Hima ha ka dur kaba yn ym lah ban pyntreikam.

Dei ban pynphai ia ki khyndew jong ka Hima, sha ka Hima kat kum ka hok ba ka laiohbat hahoi jong kita ki Khyndew ki shyiap, ym ha ka nongrim jong ka jingshong bun briew kiba shong hangta. Ka Khyndew hok jong ka Hima Khasi ka dei ban wan phai shapoh ka Hima Khasi wat lada shong bun da ki dkhar kiba na kawei pat ka jaka ne ka Hima. Kumia ruh ka jaka kaba dei jong ka Assam, kata ka dei ban leit phai shaka Assam kam pher wat la da shong bun da ki Khasi hangta. Kane ka long ka lyati kaba beit bad kan ym ailad ia ki nongwei ba wan buhai shnong ban dawa hima la ka jong tang namar ka jingbun briew jong ki.

Hynrei ka long pat kaba sngewkyndit ban iohi ia ki jingthoh ha ka kot khubor. The Sentinel dated Guwahati 27th February 1987.

kaba, iathuh ba u Home Minister lem bad'ta Revenue Minister na ka liang ka Sorkar Assam, ki la lah ia pynbeit bad u Home Minister, Sri D. D. Lapang lem bad u Revenue Minister, Sri P. R. Kyndiah na ka liang ka Sorkar Meghalaya ban don ka jingianiew briew ha Block I & II. Kumta ba ia kine ki jaka lah ban pynphai pat sha ka Meghalaya ha ka nongrim jong ka jingbun briew kiba shong ha ka. Kumta ba, la ka Block I & Block II ka la long ka hok jong ka Hima Khasi. hynrei lada ha kano kano ka jaka ha ka Block I & II la shong bun da ki dkhar Assam, ne da kiwei pat ki jaitbynriew, kitu ki jaka na ka Block I & Block II ki dei ban sah hapoh Assam. Te ki jaka na ka Block I & Block II ki ban wan phai shapoh ka Hima Khasi, ki dei tang kita ki jaka kiba shong bun da ki paid Khasi Pnar. Lada pdiang ia kane ka rukom pynbeit, ka Block I & Block II kan ym lah ban wan phai pat shapoh ka ka Hima Khasi shi tylli kat kum u pud u saam ba, dei hok ban joh. Ka jingkylli ka long da kaei ka jaka ka Assam kan ai iapli sha ka Block I & II jong ka Meghalaya namar ki jaka ba ka shim ne bat noh halade na kitei ki Block? Ha kane ka jingpynbeit ladei ban peit bha ba ki khyndew ba dei ban shim iapli bad ai iapli ki dei ban long kajuh ka jingbeh.

Kine harum ki long ki kyntien ba lasot na ka Kotkutor.

"The Sentinel" dated Guwahati, the 27th February, 1987"

"In fact, the Assam Chief Minister, Mr. Prafulla Kumar Mahanta, had already communicated to his Meghalaya counterpart the former's decision to transfer the two blocks as had been agreed to by Chief Secretaries of both States."

While reviewing the position in a ministerial level meeting at Guwahati on February 20 between the Home and Revenue Ministers of Assam and Meghalaya, it was agreed to ensure that local issues were not allowed to escalate into major troubles in the disputed areas. At the same time, the Chief Secretaries of both the States have been asked to expedite an on the spot enumeration in Block I and II so that these could be re-transferred to Meghalaya on the basis of population structure without further delay. Mr. Kyndiah disclosed."

U. Chief Minister jong ka Assam, u Sri R. K. Mahanta, u la kren mynshuwa ha ki nongthoh kot khubor da kaba ong, "ka long ka bym lah ban long ba tang namar ba ki Khasi ki la shong ha kata ka jaka, kata ka jaka kan long noh ka jong ki Khasi." Da kane ka jingkreu u pyrahaa ia ka jingpyaphai noh, ia ki jaka Khasi sha ka Meghalaya State hlor ha nongrim jong ka jingshong brierw ne

jingbun brierw. Mynta pat, kat kum ba paw ha katei ka Kot Khubor, ngi iohi shai ba u Sri. P. K. Mahanta um pyrshah shuh ia ka jingpynphai jaka halor ka nongrim jong ka jingshongbrierw ne jingbun brierw (population structure).

Balei u Sri P. K. Mahanta u poi sha ka jingkohnguh bad jingpynbeit ban ia pynphai ia ki khyndew ki shyiap sha ka Meghalaya ha katei ka dur? Ka daw ba nyngkong ka long ba, u tip ba um 'Blah ban bat ia ki Khyndew hok jong ki Khasi hapoh Assam. Ka Meghalaya kala dawa ia ka hok da kaba pyni ia ki dokumen, ia ki dular bad ki Map kiba biang. Halor jong kine ki jingdawa hok ka Assam ka ladei ban pynphai lut ia ki Khyndew hok jong ki Khasi baroh sha Meghalaya. Ka daw kaba ar pat, u iohi ia ka jingeh bad ka jingduh lada ai lut sha ka Meghalaya ia baroh ki jingtei bad ki jingkynshewsaph (investment) ba ka Assam ka la tei bad buh ha ki Khyndew jong ka Meghalaya, ba ka Assam ka la bat baroh shikatta. Namarkata, u Sri. P. K. Mahanta u la pynkloi ban pdiang ia ka jingpynbeit ia ka jingpynphai ia ki Khyndew ki Shyiap sha ka Meghalaya ha ka "Nongrim jong ka jingshongbrierw ne jingbun brierw (population structure)."

Da kane ka nongrim, ka jingpynphai kyndew kat kum ka jingshong brierw ne jingbun brierw (population structure). U Sri P. K.

Mahanta u iohi ba ka Assam ka lah ban bat noh hapoh Assam ia kito ki Khyndew Khasi baroh, kiba ka Assam ka la buhai shnong, bad latheh bun ka spah ha kaba tei ia ki jingtei, ki korkhana bad kiwei kiwei ki jingpynbha (development). Bad u iohi ba ka Assam kan duna ka jingduh lada pynphai, iapli sha ka Meghalaya da ka Khyndew jong ka ba ki Khasi ki lashong hapoh Assam, namar u iohi ba ha kita ki jaka ka Assam kam shym pat latheh spah bun ha ki jingtei bad kiwei kiwei ki jingpynlut spah (investment).

Da kane ka jingiapynbeit ka Meghalaya kan ioh ia ka Khyndew kaba katjuh ka jingheh na ka Assam na ka bynta ka Khyndew kaba katjuk ka jingheh kaba ka Assam ka bat ne shim noh na ka Meghalaya? Dei ban peit bniah ba ka jingshim bad ai iapli ia ki Khyndew dei ban long kiba iaryngkat ha ka jingheh ne jingthew ha u pud u saam. Lada ka long kumta, ka Meghalaya kan ym duh ia ka Khyndew ne ioh duna ia ka Khyndew ha ka jingiapli, hynrei ka lah ban duh ia ki lad babha (facilities) ba ka khyndew ka lah ban ai, kum ha ka rep ka riang, ha ki mar ki mata poh khyndew, ki lad khaii pateng ba ka khyndew ka lah ban ai. Ka long kumta namar ka jingroi jingpar, ha ka rep ka riang, ha ka Khaii - pateng ka shong ha ka jingdon jong ka Khyndew (location) ha kano kano ka thain, kaba lah ban ai kum ia kita ki

lad. Lehse, ka Meghalaya ka lah ban ioh iapli na ka Assam da ka Khyndew babha, kaba lah ban ai ia ki lad khaii - pateng ba bha bad ia kiwei pat ki lad jingpynroi babha. na ka bynta katjuh ka khyndew ba la ai noh sha ka Assam. Kata ka shong ha ka jingnang bad jingstad jong ki Nongsynshar jong ka Meghalaya ban ia pynbeit.

Hynrei kaba sagewdiaw ka long ba ioh ym don ka jingai bad ka jingshim kylliang ia ki khyndew ha ka jingthaw kaba katjuh ka jingheh! Ba ioh ka Assam kan pynphai sha ka Meghalaya tang ia Ki Khyndew Khasi ba lashong bun da ki Khasi, bad ioh kan bat lut ia ki Khyndew Khasi ba lashong bun da ki Dkhar khlem ai iapli da ki khyndew jongka namar jongki. Lada ka long kumta, ka Meghalaya kan dang duh bun ki Khyndew wat lada ka Assam ka la pynphai noh ia kiba bun ki khyndew hok jong ki Khasi. Ia kane ym dei ban shah da lei lei ruh.

Kaba donkam eh hakmat jong ki nongsynshar jong ka Meghalaya ha kane ka jingdawa ka long, ba ka Assam ka dei ban kohnguh ban pynphai lut ia ki Khyndew hok jong ki Khasi - Pnar, bad Garo baroh sha Meghalaya, ha ka juh ka jingheh kumba ki long katkum ki dokumen, ki dular bad ki Map, ba labuh ha hakmat ka jingdawa. Kata ka long kaba dei ban leh nyngkong. Hadien ba ladep leh ia kane, kum

ka rukom, sa ia trei bad pynbeit ia ka jing-
 ia - ai - pli bad jingia - shim - pli ia ki Khyndew
 ha ka jingthew, kaba katjuh ka jingheh.
 Kane ka long kaba donkam ba baroh arliang
 kin ym duh ia ka Khyndew na ka Hima ka-
 ba kat kum ka jingthew.

Da kaba pdiang ia kane ka rukom jing-
 pynbeit bad ka Assam, ki nongsynshar, ki
 Minister ba mynta jong ka Meghalaya ki la
 pynpaw ia kaei kaba ki don. Ki la pynpaw
 ka jingsngewlem ia ka Assam, ba ka Assam
 kan ym duh noh ia ki spah ba ka la tei
 bad buh halor jong kita ki khyndew, kiba
 la lo g sha palat jong ka bor jong ka Assam
 ban pynkyriah. Te ai ba ka Assam kan
 pynpaw kyliang ia ka jingsngewlem ia ka
 Meghalaya. Mynta ka shong ha ka jingstad
 jong ki nongshynshar jong ka Meghalaya ban
 plie ia ki dohnud bad ki khmat jong ki
 nongsynshar ka Assam ba kin iohi ha kano
 ka bynta ba kin siew kyliang ia ka Meghalaya—
 ka babha namar ka babha. Ia kane ki dei
 ban peit ba ka Hima bad ka jaitbynriew kam
 dei ban shah khuiot bym dei.

Kane ka dei ka ia, ba ki nongsynshar
 jong ka Meghalaya ba mynta bad kiba dang-
 wan ban nang bad ioh jinghikai
 na ka Niewtang ne History ba ladep jia
 ha ka jaitbynriew. Ki ladei ruh ban peit
 bad ioh jinghikai na ki jingjia ba lajia ba ka

History jong kiwei pat ki jaitbynriew. Ngi dei ban tip ba, lada ngi phong ia ki juh ki juti, bad iaid ha ki juh ki lynti bapynwir jong ka mynnor, ka Hima kan duh bad ka jaitbynriew kan long nongphetwir. To ngin long kiba khlain bad kiba shlur ban ieng ha la ka hok. Bad ngin pyrkhat jngai sha ka ban sa wan na kaei kaba ngi leh bad thmu ban leh mynta. Ka jingiohi jngai ka long kaba donkam. Khlem ka jingiohi jngai ka jaitbynriew kan iap. To ngin long kiba peit bad iohi jngai. Bad ngi lah kein ban long kiba iohi jngai tang lada ngi don ka jingieit bashisha iala ka ri bad jaitbynriew.

Kumno ki nongpeit nabar, kumno ki pyrman ki iohi halor joag kane ka jingdawa? U nongthoh khubor ha ka "Sentinel" ba 27/2/1987, u ong, "ki pyrman kiba peit bniah shaphang kane ka jingiapynbeit, ki sngew ba ka long kata eh ba ka Meghalaya kan ioh pat ia ki katto katne ki jaka, kum ka Khanapara-Basista etc da ki jingpyrkhat kumba dei ban long, wat lada ka Chandrachud Committee ka pdiang ia ka jingdawa jong ka Meghalaya kumba ka long." Ki iohi ia ka jingeh ba ka Assam kan iakynduh lada ai noh sha ka Meghalaya ia kiba kum kita ki jaka. Hynrei ka Assam ka dei ban sngew-thuh ia ka hok jong kiwei ba ki dei ban ioh. Bad ba ka Assam hi ka la shu bat bym hok ia kita ki jaka. Ka tei bad theh

ia ki spah jongka hangta haba ka tip ba kam
 dei ka hok jong ka. Ka jingkylli mynta ka
 long, "hato ka Sorkar Assam, kumjuh ka
 Sorkar India ka burom ne em ia ka 'Indian
 Independent Act, 1947? "da kaba ka laioh
 ia ka jinglailuid? Lada ki burom, kam long
 kaba eh ban pynphai noh ia ki Khyndew
 hok jong ki Khasi - Pnar bad Garo baroh
 sha ka Meghalaya. Ka Indian Independent
 Act, 1947 ka lajathuh shai ba ka la aibor
 ban pynphai lut ia ki boroh?

Ka Tele Vision Studio & Tower Etc.

Ha Catchment Area

Kham ha khmat ka Micro Wave Tower halor u lynterlum Shillong thain Laitkor, ha a kliar lum ba haneng ka shnong Mawblei na ka liang Madanrting; bad haneng ka Rngi Lawjynriew na ka liang ka Nongthymmai ladeh ka jingtih nongrim bad jingpynklireh ban toi ia ki ieeng ki baheh. Na kane ka jaka bajrong lah baniohi lut ia ka them jong ka Sor Shillong baroh kawei, bad ia ki thain ri Bhoi bad Pnar katba dang kot ki khmat. Ha ka por synrai bad tlang ruh, lada ngi khie dang step ngi lah ban iohi ia u Lum Makashang, uba shatei lam mihngi. Ha kjat jong u na sha khmat, ki lum baiong ki noh padun, bad na shadien pat ka suin bajngum. Hapdeng jongki, u Lum Makashang ha ka ior balieh kynshreng sha jrong u tam, kum tiawkulab balieh ba jngoh napdeng ki sla jyrngam.

Haba phi don halor une u Lum Laitkor, phim sngew ba don ha khyndew hynrei kum ka shiteng suin. Ka mynsiem kum ha rngaai ha dap da ka jingkmien katba ka per hapdeng ka lyer ba beh sngewtynnad hir hir, bad iohi ia ki jingiohi baitynnad kat - ba phai.

Napoh Sor Shillong, haba khmied shalor utei u lum lah ban iohi kyndiang ia ki briew kiba iatih nongrim hangta. Hynrei bun ki

briew ki bym tip kaei ka ieeng ba kin shna ne tei hangta, Na ka liang ki nong Laitkor ruh bun ki briew ki bym tip kaei ka ieeng ba yn tei hangta lait tang kito ki briew kiba dei iaid lynti nangta lynterpor. Don kiba ong ba, ki nonglaitkor kiba dei iaid lynti nangta najan ki jingtei ki ia bynniaw bad ia khniium namar ka jingtei lashai lashishisngi kan khang bad pynwit ia ka jingiaidlynti jongki.

Ki jingtei bakhraw ba lathmu ban tei halor jong katei ka nongrim ba latih mynta, ka long ka "Tele Vision Studio & Tower." Bad markrung, hadien jongka, ladon ka jingpyn-khreh ban tei ia ka "NEPCO Wireless Station." Ka Sorkar Meghalaya ka lashah bad ai jingbit ia kitei ki kap ne ki party ban shna ia kita ki jingtei. Uwei u briew uba ju ithuh ithaw bha ia uwei na ki Ophisar ha ka Land Revenue Department, D. C. Office, u la leit rung ha kamra jong u tang ban shu ia kren paralok khyndiat namar slem ym ju ia kynduh shuh. Te ha ka jing-iakren, u paralok jong uta u Officer u lakylli. Kaei sha ka jingtei ba ki thmu ban tei halor jong utei u lum ? "Oh kin tei ia ka T.V. Studio & Tower" bad ha krung jong ka pat, kham hadien khyndiat kin tei ia ka "NEPCO Wireless Station," laphai ktien u Ophisar. Haba laiohsngew ia kane uta u lok u la ong, "Oh, ngam tip, phi ong, kin tei ia ka T.V station ?" Nangta laphaiktien pat u ophisar

bad u la ong, "Kumno phim tip ? Ia ka jingpynbna ladep phah shon ha ka Government Gazette, bad ladep phah shon bad lapynmih ruh ha ki Kot Khubor ba baroh ki briew kin tip." Une u lok um tip eiei shaphang kane naba um shym ioh pule ia ka Kot Khubor ha kaba ladon kata ka jingpynbna. U ophisar u lapynpaw ia ka jingsngewtynnad ha kane ka jingiakren paralok, bad u larkhie artad haba u ladep ia ka jingiathuh. Te baroh arngut ki la shu ia rkhe bad pynkut noh ia kaba kren shaphang kane. Nangta ki la iakren noh ia kiwei kiwei pat ki kam paralok.

Ka la ju long ka rukom ha ka liang ka Borsynshar ne ka Sorkar, haba ka shim ne ai jaka na ka khyndew jong u paidbah namar jongka, ne na ka bynta ka Ophis jong kawei pat ka Borsynshar, ba kan ai ia ka jingpynbna paidbah na ka bynta kata ka jingthmu ioh don mano mano ba don jingujor. Te ki Ophis ka Sorkar ki ju don ki rukom, bad ki lad kiba bun ha kaba pynmih ne ai ia ki jingpynbna paidbah. Ki ju leh ia kane da kaba phah shon bad pynmih ia kita ki jingpynbna ha ka Government Gazette. Da kaba wah kum ia kita ki jingpynbna ha ka Notice Board jong kata ka Office. Ki ju phah shon ruh ia kita ki jingpynbna ha ki kot khubor ba ju pule paidbah ki briew. Don ruh ki jingpynbna ba ki phah sha ka Radio Station

ba yn pynbna ha u paidbah nangta.

Ki rukom ai jingtip ne jingpynbna paidbah da ki lad ne ki rukom kumba la kdew haneng ki biang ha ki babun ki bynta, hynrei kim long kiba biang lut nadong shadong. Don ki briew ki bym lah ban iohdiang ia ka jingpyntip ne jingpynbna ba lapynmih lyngba ki tei ki lad, wat lada lapyntrei kam lut ia ki baroh ha kajuh ka por.

Ki paidbah babun jong ki shnong kiba don hajan jong katei ki Jaka, kim tip ba ka Sorkar Meghalaya ka la ai jingbit ia ki bor bapyniaid ia ka T.V. Station bad NEPCO ban tei ia ka T.V. Studio & Tower, bad ia ka NEPCO Wireless Station ha utei u Lum. Ka daw ka long namar don bun ki briew kiba shong harud sor ki bym pat ieit ban pule kot khubor. Bad ki paidbah babun kim ju pule Gazette lait tang kito ki briew kiba don ka jingiadei kam bad ka Sorkar. Bad kum kita lada don, ki pule ruh taŋg ia kata ka bynta kaba iadei bad ka kam jongki hi, shimet. Ka jia pat ba wat kito kiba ju pule Kot Khubor ruh ki lah ban ym ioh ia kata ha kaba ladon kum kata ka jingpynbna.

Ki briew ki lah ban ym ioh ia ka jingpynbna badei na ki Kot Khubor ha ki bun ki rukom, bad ki jingjia. Wei. Ki lah ban duh ia ka Kot Khubor kaba don ka jing-

pynbna haba jia ba ki leit jingleit shabar bad ba kim ioh por ban leit thied ia ka Ar. Naba kim tip lpa ba kan don kum kata ka jingpynbna ha kata ka Kot Khubor ha kata ka sngi. Lada kin jin da la tip lupa, kin jin da la phah iano iano ban leh shitom ban leit thied ia ka namar jong ki. Kumta haba jia ba ki leit jingleit ne ki bun kam ki lah ban sangeh ne pud shisngi ruh khlem Kot Khubor. Lai. Kiwei pat, kiba da ka jingmlien jongki ki lah ban pule ia kiwei pat ki jait Kot Khubor kiba lehse ka Sorkar ne ka Office Sorkar kam poi pyrkhat ban phah shon ia kaba kum kata ka jingpynbna ha kita ki Kot Khubor.

Ngi tip ba ki briew baroh ki don lakajong ka jingsngewtynnad, bad lakajong ka jingjied ha kaba pule ia ki Kot Khubor. Kiwei ki jied ia kawei, bad kiwei pat ki jied ia kawei pat. Kumta terter. Saw. Ka Sorkar hi kam lah ban phah shon ia ki jingpynbna ne jingpyntip jongka ha baroh ki Kot Khubor ba ki paidbah ki pule hapoh ka ri. San. Ha kajuha ka rukom ym don ruh ki paidbah kiba la ju pynmlien ne balah ban thied lut bad pule lut ia baroh ki Kot Khubor ba lapynmih hapoh ka ri man ka sngi. Hynriew. Ka Sorkar ne ki nongai ia ka jingpynbna kim lah pat ruh ban tip sakhiat kano ka jait Kot Khubor ba baroh ki briew kim bit ban duh ban pule iaka. Hynriew. Nalor

jong kitei bareh, don pat bun ki briew ki bym nang ban pule ban thoh. Na ka bynta jongki, ka jingpynbna da ki Kot Khubor kam myntoi ei ei—kim lah ban tip.

Ka jingpynbna paidbah da ka Radio ka long kaba donkam, haba ai ia ka jingpynbna da ka ktien ha kita ki briew ki lah ban sngewthuh. Kata ba ki briew kin ioh ban sngap ia ka jingpynbna ha la ka jong⁷ ka ktien. Hynrei ka jingpynbna lyngba ka Radio ran kam lah ban pynpoi lut ia kiba kum kita ki jingpynbna ha ki shkor baroh. Ka daw ka long ba don tun ki briew ki baduk bad ki bym ju buh Radio ha ieeng. Wat kiba don Radio ki lah ban ym tip. Naba kim lah ban tip lra ba kan don kum kata ka jingpynbna, bad ha kano ka por on pynbna ia ka. Kumta wat la ki don Radio ha ieeng ki lah ban ym plie ia Radio ha ka por ba pynmih ia ka Khubor na Station. Kiba ioh-sngew ki lah ban long ki bym don jingiadei bad kata ka kam. Kumta kim salia.

Ka jingpyntip da kaba wah ne tah ia ka Jingpynbna ha ka Notice Board jong ka Office ka ai jingmpntoi tang ia kito ki briew kiba ju leit kum ha kata ka Office namar ki don ki jingiadei kam bad ka. Ki briew ki bym don ka jingiadei kam bad ka kin ym leit shata. Kumta kin ym lah ban ioh ia ka jingtip na ka jingpynbna ba, la sdien ha ka

Notice Board. Nalorkata, ka jingpynbna ha ka Notice Board kam iarap ruh ia ki briew ki bym nang ban pule.

Ki Khasi naduh myndai haduh mynta ki ki don ka rukom jingpynbna paidbah ka ba-bha. Kata ka long da ka jingpyrta shnong kaba da iald lyngba da ka kynto ne ka hukum na u Rangbahshnong. Ka jingpynbna paidbah da kane ka rukom ka long kaba kham janai na baroh, naba uwei pa uwei u briew uba don ha shnong u lah ban ioh sngew bad ban tip. Ki shnong bad ki paidbah bamarjan baroh kin jin da latip ia ka jingjia kaba iadei bad ka die ka thied khyndew ha kaba tei ia ka T. V. Studio, bad ia NEPCO Wireless Station, ha u Lum Laiikor, lada ka Sorkar ka laai jingtip shaphang kane ha ki Rangbahshnong ba marjan. Hynrei ka Sorkar kam shym leh ia kata namar ka pyrkhat, lehse, ba kane kam don jingktah ia ka bhalang jong u paidbah ba marjan ne jngai.

Ka Sorkar ne ki nongsynshar ki don shihun ki jingpynbna ba iadei bad u paidbah. Bad haba don ki jingpynbna kiba donkam bad baktah ia ka jingbha lang u paidtah, ki nongsynshar kin jin da laleh ia ka babha tam lada kin phah ia ka sorbud ne copy jong ka jingpyntna sha u Rangbahshnong. Bad u Rangbahshnong pat un pynbna ia kata ha ki paidbah da ka jingpyrta shnong kumba la ju

don ka rukom ban iapyrkhat lang. Ha ka jingshisha ka long kaba bha ruh ba lada ka Sorkar kan phah sha ki Rangbah shnong ia ki sorbud ne copy jong ki ain ki rule kiba iadei bad ki Khyndew ki shyiap, ki khlaw ki btap, ka khaii pateng ne ka die ka thied bad kum kita kiba don ka jingiadei bad jingktah ia ka jingbha lang jong u paidbah ha ka shnong bad ka ri.

Ngim don ka jingryrshah ban tei ia ka "T. V. Studio & Tower", ne ia ka "NEPCO Wireless Station", ne ia kanokano ka jingtei kaba long na ka bynta ka jingbha jong ka ri. Ki Paidbah ki donkam ia ki T. V. Studio & Tower, kumjuh ia kiweikiwei ki jingtei kiba donkam namar ka ri bad ka jaitbynriew. Hyrrei kaei kaba ki paidbah bapeitjngai ki kwah ka long ba, kum ia kita ki jingtei, ne ia kiweikiwei pat ki jingtei baroh dei kein ban tei halor jong ka jaka ka ban ym pynwit ne ktah ia ka jingbha lang jong ki shnong, bad ki paidbah ba marjan.

Ka T. V. Studia & Tower bad ka NEPCO Wireless Station ha katei ka jaka kaba lathmu ban tei mynta ka ktah shibun ia ka jingbha lang jong ki shnong, bad ki paidbah ba marjan. Phi iohi ha krung jong kitei ki jingtei ba lathmu ban tei mynta, ka don kawei ka wah duid. Kane ka wah rit ka pynlong ia ka wah Demthring ba bna naam ha ka jingbha bad

jingkhuid kum ka um bam um dih. Haduh mynta ki briew ki dang tong um bam na kane ka wah rit. Kane ka wahduid ka mih na kawei ka them ktieh kaba don tang khyndiat spah feet na trai jong ka Micro Wave Tower. Ka T. V. Studio, bad ka NEPCO Wireless Station ruh ki iajan bad kane ka tyllong um.

Lada ia ka "T. V. Studio & Tower" bad "NEPCO Wireless Station" latei bad shna halor jong katei ka jaka ba mynta, kaba long hajan bad markrung jong kato ka wah rit, kato ka wah rit ba bsa um bam bad um dih ia ki briew kan kylla sniew bad jakhlia noh (polluted). Kan ym long shuh ka wah duid kaba bit ban pynlong um bam um dih ne ban sait ban khlieng kumba ki briew ba harum shnong ki ju leh haduh mynta. Balci? Namar ki um jakhlia na ki khap um ne nala ba wan tuid na sawdong jong kitei ki jingtei ne ki ieeng, khamtam ka um jakhlia na ki paikhana bad na ki septic tank baroh kin tuid lut hapoh kane ka wah duid. Hato kane kam ktah ia ka jingbha lang jong ki briew kiba donkam ia ka um bam um dih? Kane ka long ka mat kaba nyngkong, ba ngi iohi ba kitei ki jingtei, ha katei ka jaka ka ktah ia ka jingbha lang jong ki paid kiba marjan.

Kawei pat ka jingsniew ka long ka jingpynduh noh ia ka Catchment Area. Ka jaka ha kaba lapynkreh ban tei ia ka T. V,

Studio, bad ia ka NEPCO Wireless Station ka don hapoh u lynter lum bahap hapoh ka Catchment Area, bad kaba lalong ruh hapoh ka Green Block ne Government Reserve Forest (ka khlaw kyntang ka Sorkar) mynshuwa. Ka government Reserve Forest kumba long mynshuwa ka bteng terter naduh bakut jong ka Reserve Forest ba mynta, bad ka tap lut ia u lynter lum baroh haduh ban da poi bad iashem bad ka Shillong Jowai High Way sha khlieh Madanrting bad Mawblei. Ia kane ka jaka baroh kawei labat da ka Sorkar Phareng kum ka Government Reserve Forest haduh ka snem 1947. Na ka bynta ka jingbha jong u paidbah bad na ka bynta ka burom jong ka ri, ia kane ka Jaka ladei ban bat da ka Sorkar bad ban pylong ia ka, ka Government Reserve Forest sa shisien pit. Hangne ladei ban thung ia ki dieng baitynnad bad pylong ia ka Khlaw barben.

Ka khlaw barben ka ban tap halor jong une u lynter lum kan long ka jingitynnad bad ka jingiphuh iphieng ia ka Sor Shillong. Bad kata kan long ka burom ia ka ri bad ka jaitbynriew naba ka Sor Shillong ka long ka Nongbah bapawnam jong ka ri bad ka Hima jong ngi hi. Nalorkata, ka khlaw barben ka ban tap lup halor une u lynter lum kan ai ia ki jingpynbha, bad jingkyrkhu ki ba-bun ia ki briew bad ki shnong ia ki thain ba marjan, bad ia ki briew jong ka Sor

Shillong baroh.

Ki khlaw barben ki long kiba itynnad bad kiba ai jingkmén. Ki ai ka jingkoit jingkhlain ia ka met bad ka mynsiem. Ym don mano mano ba lah ban len ia kata. Ki Khlaw ki pynkhuid bad ki ai ia ka lyer kaba khuid la ngi ring mynsiem. Ka lyer kaba khuid ka long kaba donkam tam na ka bynta ka jingkoit jingkhiah. Ki rong bajyrngam jorgka ki long ki dawai bad jingpykhiah la ki khmat. Ki saiantist bad ki doctor bastad jong kane ka juk mynta ki lalap ia kane ka jingshisha.

Ki briew kiba shong ha Sor ki sniew kloi ki khmat. Ka daw ka long namar ka jingphalang jong ka jingthaba na ki jingtei, na ki phyllaw, bad na ki surok bala pynjlih bha bad na kiweikiwei ki jingthaba. Phi shem hi da lade katno ki khmat ki tyrshoh bad ki pang haba peit slem ia kieikiei kiba thaba. Hynrei tang shu phai bad peit sha ki khlaw bajyrngam ka khmat ka tngen jai. Ki briew na ki Sorbah jong ka pyrtnei man ka por ki hap ban shim shuti na ki jingtrei. Bad ki ju leit sah pyngad bun sngi sha rud nong ba don bun ki khlaw bajyrngam ban ioh ka jingpynkoit ia ki khmat. Ki briew jong ka Sor Shillong bad ki shnong bamarjan ki donbok ba dang don ki khlaw kattokatne ha u lynterlum Shillong. Kim don kam ban leit sha jngai, hynrei tang ban shu

khmieit la ki khmat na ieeng ba ki shong ki lalah ban ioh ia ka jingtnge. Ka dei ka kamram bakytang jong ki briew jong ka Sor Shillong baroh ba kin ialeh ban pynneh ia ka Khlaw barben bad bajyrngam ha baroh shi lynter jong U Lum Shillong.

Ka jingitynnad jong ki khlaw bajyrngam ba shoh ha ki khmat, ka ai ruh ka jingkmren. Bad ka jingkmren ka long kawei na ki jingai bakhraw kaba pynkhiah ia ka mynsiem. Ym don balah ban pynkhiah ia ka mynsiem haba laduh ka jingkmren.

Ki khlaw barben ki don ka bor kaba lalah ia ka jinglong jong ka suin bneng. Ki wanrah ia ka jinghap ryntih jong u slap. Bad ki long ka thymmei ha kaba ngilah ban ioh ia ki umphohlew kiba ai ia ki um bam umdih bakhuid. Te ladu latei ia ka T V. Studio, ia ka NEPCO Wireless Station bad ia kiwelkiwei ki ieeng h lor utei u lynterlum, ha katei ka jaka ba lakdow haneng, ki khlaw na katei ka jaka bad na utei u lynterlum baroh kin duh. Kun ta ruh ki briew jong ki shnong ba marjan, bad ki briew jong ka Sor Shillong baroh kin duh lut ia kitei baroh ki jingkyrkhu ba ka Khlaw barben bad bajyrngam ka don ban ai. Phi lah ban pynpaw ia ka jingsngew jongphi baroh sha ki nongshynshar, bad shi ka Sorkar shaphang kane. Ka Sorkar bad ki nongshynshar ki lah ban sngew lada ki johi kumba.

phi iohi. Lada ki leh ia kaba dei, kata hi kan long ka burom jong ki.

Diengthew Ai Jingbit

Ki paidbah ki don lakajong ka jingiohi shaphang katei ka jaka ha kaba lathmu ban tei ia ka T.V. STUDIO, bad NEPCO Wireless Station kumba la ia kdew ha shuwa. Ka jingkylli mynta ka mih. Hato u D.C. ne ki Ophisar kiba hapoh jong u ki laleit peit ia katei ka jal a shuwa ban ai jingbit (permision) ban shna ia kita ki jingtei ?

La kumno kumno la shu ngeit ba ki laleit peit. Namar khlem da leit peit kumno kin ai jingbit ban tei ? Lada kim shym la-leh ia kane kata hi ka long ka jingduna na ka liang jongki. Hynrei ka paw shai mynta ba ki ophisar jong ka Sorkar, lada u D.C. ne ki officer rit kiba hapoh jong u, kiba laleit peit ia katei ka jaka kim pyrkhat, ne kim iohi ia ka jingdonkam ba ia kane ka jaka dei ban wanrah biang hapoh ka Government Reserve Forest. Kim shym pyrkhat ruh ba da kaba ai jingbit ban tei ieeng tei sem halor jong une u lynterlum kan pynjakhlia ia kato ka wahduid bakhuid, bad kan pynduh ia ki babun ki jingkyrkhu ba ki briew ki lah ban ioh. Imat ka jingpyrkhat jongki, bad ka jingpeit jongki ka long beit tang na ka liang ka ain (legal point of view) ioh don jingwit ne jing uxor eiei ha ka jingdawa hok halor

ka khyndew ka shyiap.

Ha kane ka bynta, ki briew jong ka Sorkar ki lah ruh ban peit bad pyrkhath ia ka jingbha ba ki briew ki lah ban ioh tang na kawei ka liang. Kata ia ka jingbha ba ki lah ban ioh myntoi na ka NEPCO Wireless Station bad na ka T.V. STUDIO & TOWER. Hynrei kim shym peit ia ka jingbha kaba khamkhraw ba ki briew ki lah ban ioh da kaba ri khuid ia katei ka wah duid, bad da kaba wanrah biang ia ka Government Reserue Forest halor u tei u lynterlum baroh kumba long mynshuwa. Ngi ki paidbah ngi iohi ba ka jingdonkam ba ki briew jong ki thain ba marjan, bad ki briew jong ka Sor Shillong kin ioh na ka Catchment Area, na ka Government Reserve Forest ka ban long halor une u lynterlum baroh ka khamkhraw ban ia ka jingmyntoi la lin ioh na ka T. V. Studio & Tower, bad na ka NEPCO Wireless Station kat kum kine ki mat harum.

Ia ka T. V. Studio & Tower, bad ka NEPCO Wireless Station, lada weng noh na katei ka jaka, lah ban tei ha kiwei pat ki ki jaka ba kynjang halor lum jong ka shnong laitkor hi. Don shibun kum kita ki lum ba kynjang hapoh ka shnong Laitkor kham pajih na utei u lynterlum ba mynta. Bad na ki jingtei na kita ki jaka ki lah ban

ai ia ki juh ki jingdonkam (services) na ka bynta ki briew baroh. Ka jingtreikam jong kita ki jingtei na ka bynta ka jingbha jong ki paipbah kani shym duna eiei ha ka bor bad ha ka jinglah da kaba kynriah na katei ka jaka bad tei ia ki jingtei ha kiwei pat ki lum laikor.

Hynrei ka Catchment Area, ka Government Reserve Forest kaba don ha kawei ka jaka, ka don ki jingtrei (services), bad ki jingkyrkhu bakyipang tang ia ki briew kiba don ha kita hi ki thain ba naian. Shisien ba ia kane ka Cathment Area, ne ia ka Government Reserve Forest ha kane ka jaka la pynduh noh, ki briew jong kane ka thain ki laduh noh junom ia ki jingkyrkhu baroh ba ki dei ban ioh lada ym shym lafynduh ia ki. Ki Catchment Area, bad ki Reserve Forest ha kiwei pat ki jala kim lah ban ai ia ka juh ka jingtrei babha (service) bad jingkyrkhu na ka bynta jong ki briew bad ki piaidbah ha kiwei pat ki jaka. Nulorkata, ka long kaba da eh lan ioh ia ki Catchment Area, bad ia ki Government Reserve Forest na ka bynta ban ai ia ki jingkyrkhu badei biang ia ki briew ha kano kano ka jaka, namar kane ka donkam ia ka khyndew bad ka jaka kaba iar. Hynrei ka long kaba kham suk shibun eh ban ioh ia ki nongrim ieeng ban tei ia ki T. V. Studio ne ia ka NEPCO Wireless Station, ne ia kino, kino ki jingtei. Ka long kumta, naba ka

nongrim ban tei ia kum ki tei ki ieeng ne jingtei ym don kam shibun ka khyndew ne ka jaka.

Lehse ka Sorkar, ne ki nongsynshar jong ka Hima kim shym ladon ne buh ia ki diengthaw ban pyni, ne bthah, ne ialam ia ki officer, ne ki briew Sorkar ba dei ban bud kum, hangno ki dei ban shah ban tei ia ki jingtei, bad kum hangno ne haba don kiei ym dei ban shah ban tei ne thaw ia ki ieeng ki sem. Ne ia kino ki jaka ba dei ban tyngkai bad ia kino ym dei ban tyngkai. Lakumnokumno ki officer bastad bad bakitkhia jong ki Department, kita ki long ne ki dei ki nongaibuit (advisers) jong ki nongsynshar, ne ka Sorkar. Dei maki ki ban ai jingmut, bad ki ban buh ia ki jingtyrwa ha khmat ki Ministers, ki nongsynshar bad ka Sorkar ia kaei ba dei ban leh na ka bynta ka jingmyntoi, jingpynbha ba khamkhraw ia ka jaitbynriew bad ia ka Hima.

Ka Sorkar ne ki nongsynshar ki donkam shibun ki nongai jingmut (advisers) ha manla ki dkhot trei kam ki bapher. Khamtam eh ha ka liang kaba iadei bad ka Science, Technology bad Engineering etc. Ka long kumta, naba ym don ki nongsynshar kiba lah ban pule bad tip lut ia barch ki tnat jingpule, bad kiba tip lut ia baroh ki tnat jingtrei kam. Ki bym pule ia kata ka lain, kim tip kumno kata ka jingtrei kan ktah ia ka mariang bad ia ki briew kiba shong ha ka.

Ka Sorkar Meghalaya ka ladon ka Soil Conservation Department. Ka Forest Department. Ka Public Health Department. Ka Town Planning Department. Kine ki Department ki don jingladei lang ha ka um, ka khyndew, bad Khlaw. Wat lada kam pat don ka Department of Environment, tang kitei ki Department haneng, ki lalah ban ai ia ki jingmut (advices) ki babiang ia ka Sorkar ha kaba iadei ban thaw ia ki jingtei ne ieeng ha kano kano ka jaka, ban lait na ka jingpynsiew ia ka um bam um di, ia ka Iyer, ia ka khlaw ka btap kiba ktah ia ka jingbha jong ki briew. Ki lah ban leh ia kata lada ka Sorkar ka khot ha kano kano ka por. Ha kaba ai jingbit ban tei ia ka T. V. Studio & Tower, ia ka NEPCO Wireless Station bad kiwei kiwei ki jingtei halor katei ka jaka balapynkhreh mynta, kaba long hapoh Catch ment Area, ngim tip lada ka Sorkar ka la khot ne em ia ka meetting ne Jingialang jong ki Director na kitei ki Department ban wad ia ka jingai jingmut bastad jongki.

Ka Sorkar ka ladei ban khot i ki Director jong ka Soil Conservation Department, Forest Department, Public Health Department, bad ka Town Planning Department ban ia pyrkhat bad ai jingmut ha kaba tei ia ki jingtei ha katei ka jaka. Kitei ki Director kiba la passed bad pyntbit ha ka jingpule, bad kiba la pyntbit kyrpang ruh ha ka jingtrei ha ka

jingiadei bad ka Um ka wah, ka Khyndew ka shyiap, ki khlaw ki btap, bad ha kaba thaw ia ki lad ban wanrah ia ki jingpyntrei na ka bynta ka jingbha u paidbah, kin ai ka jingmut bad iathuh ia ka Sorkar ia kaei ba ka dei ban ai hukum ban leh. La dei ban leh ia kata namar kane ka jaka ha kaba la thmu ban tei ia kitei ki jingtei ka hap hapoh ka Catchment Area, bad ka long ka jaka kaba la-dei ban pynlong ia ka Government Reserve Forest.

Lada ka Sorkar kam shym lakhot ia ka jingialang ne meeting jong kitei ki Director etc ban ai jingmut, te khlem artatien ha kata ka jinglyndet ne jingbymkhot la don ka jingduna. Hynrei lada lakhot ia ka jingialang jong kitei ki riewstad (Directors), bad lada ki pat ki la ai jingmut ia ka Sorkar ba, ka bha ban ai jingbit ban pyntrei ia ki jingtei, kata shisha kan pynlong ia ki paidbah ban sngew-lyngngoh shirta ia ka jingai jingmut bastad jongki. Namar ka jingai jingbit ban shna ia ki jingtei ha katei ka Catchment Area, ia kato ka wahduid bakhuid la pynjakhlia. Ia ka environment hi ha kato ka jaka lapynsniew : Naba ia ka um lapynjakhlia. Ia ka khlaw ba dei ban tap lup ha kato ka jaka lapynduh, bad ryngkat bad kata shibun ki jingkyrkhu bapynbha ia ki briew, ba ki lah ban ioh na kata ka khlaw kita ruh baroh ki laduh.

Ki paidbah ki pangnud ba ia ka wahduid Demthring lapynsniew bad pynjakhlia (polluted) da kaba laai jingbit ban shna ia kitei ki ieeng hajan jongka. Hato ka Sorkar Meghalaya ka lah ban hukum ne bthah ia ki trai jong kitei ki ieeng ban leh ia kane harum? Wei. Ba kin ym thaw ia ka paikhana hajan jong kato ka wah duid. Ar. Ba ia ki um jakhlia baroh ba mih na kitei ki ieeng, na ki paikhana bad septic tank ym dei ban pyntuid da ki khap um ne nala shapoh kane ka wah duid. Hynrei ki dei ban thaw ia ki khap um ne nala ha kata ka rukom ba, baroh ki um jakhlia ba wan mih na ki jingtei, bad na ki paikhana ne septic tank kin hap hapoh kita ki khap ne nala um ki ban iaid sha kawei pat ka liang! Hynrei kaba bha tam ka long da kaba rah noh ia kitei ki ieeng sha kawei pat ka jaka.

Ki paidbah ki kwah ba ia ka wahduid Demthring kaba mih na ka them Micro wave Tower dei ban ri khuid. Kunta ba ia ka um jongka ki paidbah ki lah ban pyndonkam kum ka um bam bad ka um dih kumba ju long naduh mynshuwa. Ha ka jingshisha ia baroh kawei ka them ktieh kaba long ka tynrai jong ka wahduid Dem Thring ha trai ka Micro Wave Tower, ladei ban shim noh da ka Sorkar. Bad ka Sorkar kan pynlong ka Thwei baheh ban pynlang ia ka um kaba mih nangto

Kane ka them ktieh ka ladon ka tynrai ne ka tyllong um ka bym ju rngat. Laiphew snem bad sawphew snem mynshuwa kane ka them ka long ka ahor bah ba dap da ka um. Hynrei naduh ba ki briew ki latar khap um ban pynrkhiang, bad lapom ia ki dieng ki siej, ka um ka la rit ria. Bad bun ki khyndew ba sha jngai na ka tynrai ki la sdang rkhiang. Hynrei ka tyllong um ka sah bad ka neh, kam ju rngat bid lyiur bad tlang. Kane ka them ktieh ahor ka long kum ka pliang hangtei ha jrong lum. Lada ka Sorkar ka den ia ka um nangtei na tynrai ne tyllong, kato ka them baroh kawei kan long ka Thwei ne ka pung kaba dap da ka um khuid.

Haba ka Thwei ne ka Pung Um baheh kan don hangtei ha khlieh lum, kata ka don ban ai shibun ki jingmyntoi. Ia ka um na kata ka Thwei lah ban ring um dih sha ieeng ki briew shapoh ki shnong ba sharum. Ka um na kato ka Thwei kaba na khlieh lum, ka lah ban bsa ia kiwei pat ki um pohliw kiba don ha trai lum ha kiba bun ki jaka. Hangta kan long ka jingkyrkhu ia ia ki briew bad ka jingpynbha ruh ia ka environment.

Lehse, lah ban don kiba ong, ba lada den ia ka um ha kato ka them, ka um kan ym dap. Ka long kaba shisha ba ka um kan ym dap tang ha ka shi snem. Hynrei katba nangiaid ki snem. ka khyndew kan nang

long ktieh bad kan bat shibun ka um. Bad ka um kan nangdap bad kan nangkiew hi lyngba ka jinghap u slap na jrong lyngba ki por, bad na ka jingkyrsei jong kata kaba ladon lupa ha ka khyndew. Pyrkhat ia kane mynta. Ka um ka dang mih na ka tynrai haduh mynta bad lyiur bad tlang haba ym don shuh ka ktieh ahor. Haduh katno ka jingmih jong ka um kan long kaba khraw, lada ia ka them baroh kawei la pynjem bad la pynlong ka ktieh ahor? Ka khyndew katba ka nang jem bad katba ka nanglong ktieh ahor katta ka nangbat shibun ka um. Bad ka um ha ka ktieh ahor kam ju rnat lano lano naba ka bat ia ka um, bad ka pyllait ia ka suki suki. Ka pung kh'em ka ktieh, tang mar shu pyl-lait ka um ka lamareh lut bad la ka lar-khiang raw. Hynrei ka pung um kaba dap da ka ktieh ahor, wat lada pyllait ka um ka iaid shuki jai bad kam ju rnat noh. Nalorkata, haba den ia kato ka them, ka khyndew baroh ha ka them kan long ka ktieh, bad nalor jongka ka um kan kiew sha jrong, bad kan long ka thwei suki suki.

Ki paidbah ki kwah ban pynbha ia ka environment (mariang): Ki kwah ba ka um kan reh, kan long kaba khuid bad ka babit ban bam ban dih. Ki kwah ruh ba ka lyer ba ki ringmysiem kan long ka bakhuid. Kumta ba mangi bad ki khun jongki pateng la pateng kin long kiba khlain bad kiba koit

bakhiah. Ki kwah ruh ba ki mrad bad ki sim ki doh, kiba long ka jingitynnad bad jingsngewbha ia ki briew kin neh kin sah. Kine baroh ki don ka jingiasnoh bym lah ban khlad na ka Khlaw. Haba Ka Khlaw ka don bad ka neh ka sah, ia kitei baroh lah ban pynioh bad pynneh pynsah. Ka Khlaw ka long kaba donkam eh ha jingim jong u khun bynriew. Khlem maka u khun bynriew un duh lut ia kiba bun ki jingkyrkhu. Ia utei u lynterlum Shillong - Laitkor, naduh baktut jong ka Government Reserve Forest bamynta haduh kaba iashem kad ka Shillong-Jowai Highway ha Madanrtng-Mawblei, ngi ki paidbah ngi kwah bad ngi angnud ba ka Sorkar kan shim noh halade bad pynlong biang ia ka Government Reserve Forest kumba la long mynshuwa. Ia ka T.V. Studio & Tower, ia ka NEPCO Wireless Station, bad ia kiwei kiwei pat ki jingtei nador jong utei u lynterlum, ngi kwah ba ka Sorkar kan pynkynriah noh, bad kan ai jaka ha wei pat. Ha ka thain Laitkor, kham pajih tang khyndiat na utei u lynterlum, don shibun ki jaka ba kynjang. Ka jingjrang jongki na ka Sea lavel ka long hi katjuh kum kato ka jaka ha kaba la thmu ban tei ia ka T.V. Studio & Tower, bad ia ka NECO Wireless Station. Kumta ym don ei ei ka jingduh ne jingwit ha kaba pdiang ia ka Khubor ne phah ia ka khubor lyngba kitei ki jingtei.

Ka jingduh noh jong ka Khlaw na kitei

ka Catchment Area ym lah ban bujli da ka-wei pat. Bad haba ia ka Khlaw ha kane ka jaka la pynduh, ia ka environment ha kane ka jaka ruh la pynsniew ym lah ban pynbha pat. Ka jingpynjot ia ki khlaw na ki jaka ba ki dei ban don, ka jingpynsniew ia ki tynrai ne ki tyllong um, bad ka jingpynjakhlia ia ki um ki wah ki la kylla long ki jingeh ba ki brieve ha ki ri sawdong ka pyrtnei baroh ki la iakynduh mynta. U Khun bynriew uba la pynsniew bad pynjot ia kine ki jingai bakordor jong ka Mariang, u la-ngat mynta hapoh ka juh ka jar thaw hi ba u lah ban duh ialade hi na sla jong kane ka pyrtnei.

Ki jaitbynriew sawdong ka Pyrtnei mynta ki la iaksaid ban lait na kane ka jingpynjot lade tang namar ka jingkhapnyp, ka jingkhwan shimet, bad jingkwah lalot ban ioh tei ieeng paki ha ka shi sngi. Mynta hata ki la shah sympat ha ka Mariang, baroh baroh ki la ia ieng smat ban thaw ia ki ain ki kanon ban iada ia ki khlaw na ka jingpynjot, ban iada bad ri khuid ia ki um bam um diu, ban ri khuid ia ki phud bad ki wah, bad ban iada bad ri khuid ia ka lyer. Lada ka ain ba ki thaw ka long ka baim, lada ki pyntrei kam shisha ia ka, ki lah ban ioh pat ia ka jingbha kaba ki laduh. Hynrei kata ka wan khyndiat pa pakhyndiat da ki phew snem. Kim lah ban tei ia ka Khlaw ha ka shi

sngi. Ia kata kaba ki la pynjot ha ka shi-
sngi, kin hap ap da ki phew snem hadien
ba ki la trei shitom ba kin ioh pat ia ki.

Ka Ri India, kumba long-kiwei pat ki ri,
ka lamad ia ki juh ki jingeh. Ha ri India
baroh kawei hi ladon ka jingpom pathar
bad jingpynjot ia ki Khlaw, bad ia ki um ki
wah lapynsniew bad pynjakhlia. Na ka byn-
ta ka jingbha jong ki briew lajong ha India,
ka sorkar India mynta ka lathaw bad pynlong
Aiñ ka kine harum, ban iada na ka jingpyn-
jot ia ki khlaw, bad na ka jingpynjakhlia ia ka
um bad ka lyer. Wei Ka Sorkar ka lathaw
ia ka "Water (Prevention and Control of
Pollution) Act, 1974, ne ka Aiñ Um (ban
sumar bad iada ia ka um na ka jingpynja-
khlia) 1974, Ka Air (Prevention and control
of Pollution) Act, 1981, ne ka Aiñ lyer (ban
sumar bad iada ia ka lyer na ka jingpynja-
khlia) 1981. Nangta ka Sorkar India ka la-
thaw ruh ia ka aiñ iada kaba khamiar bad
kaba kynthup lut ia kitei baroh. Kane ka long
ka Environment (Protection) Act, 1986, ne ka
Aiñ iada ia ka Mariang, 1986. Kire ki aiñ kin
trei kam ha baroh ka ri India. Kine ki
aiñ baroh kim long tang na ka bynta ban
iada na ka jingpynjot ia ka mariang,
hynrei ki long ruh na ka bynta ban pynbha pat
ia kieikiei kiba don ha ka mariang ia
kiba u khun bynriew u lapynsniewdur da ka
jingleh bymsuidñiew.

U Prime Minister, Rajiv Gandhi u labthah ia ki States (Ki Hima) baroh hapoh ri India ba kin seng ia ka "Environment Protection Council", da kaba pynkhamti ha ka ia ka kamram ban pyntreikam na ka bynta ka jing-iada ia ka mariang (enviroment). U Prime Minister u la ong, "Lada ngim lah ban iada ia ka enviroment (mariang- k. m. ka um, ka lyer, ka khyndew, ki khlaw ki bta, ki sim ki koh, ki mrad ki mreng etc) ngin duh noh ym tang ia kita ki jingmih kiba ka mariang ka ai (natural resources) hynrei ngin duh noh ruh ia ki lad baroh kiba teh ia ka jingim jong ngi."

Kitei ki aiñ iada baroh ba ka Sorkar India ka lathaw ki long bad ki dei na ka bynta ka State (Hima) Meghalaya ruh, namar ka State Meghalaya ka don hapoh ka Indian Union. Kitei ki aiñ baroh kin wallam pat ia ka jingpynbha ia ka enviroment (mariang) haba ka Sorkar kan pyntrei kam ia ki. Ka dei ia ngi ki paidbah baroh ban sumar ia ki bad iarap ia ka Sorkar ba ka lah ban pyntrei hok ia ki.

